

老人權益中心

當初應承要認認真真 全民退保忽然變扶貧？ 梁振英你痴咗邊條筋！

老人權益中心(下稱本中心)由一群貢獻香港社會一生的基層老人所組成，多年以來，本中心一直關注種種與長者權益有關的社會政策。面對香港社會人口老化和貧富兩極化日趨嚴重，歸根到底就是特區政府一直迴避設立全民退休保障計劃。老人權益中心反對政府的「縮骨」做法，將設立「全民退休保障制度」變成「扶貧問題」處理，我們要求政府另行成立跨部門的獨立委員會，督促政府在五年任期內，就設立「全民退休保障」提出方案，進行公眾諮詢及落實推行全民退休保障計劃。

全民退保變扶貧 振英認真得把口

「梁振英我見過幾次，我話希望你要搞全民退休保障一定要轟轟烈烈，唔好留番個爛攤子比下一代。佢就話：『搞全民退休保障唔駛轟轟烈烈，認認真真就得啦』，我以為今次終於等到有人肯搞，點知講講吓變咗將生果加到\$2200，又要審又要查，仲邊係全民退休保障呢？呢個長者生活津貼，做鹽唔鹹、做醋唔酸，食你唔飽、餓你唔死，佢真係『痢屎落褲襠等身鬆』，個問題仲係到，都仲未解決！今次仲衰，叫佢搞全民退休保障，佢轉個頭變做扶貧，真係『隻雞同隻龜都分唔真』，唔知痴咗邊條筋！」

長生津唔湯唔水 不要留下爛攤子

「今時今日，我地班老人家出黎爭取，都係為下一代，唔係為自己架！」我們這一代長者為香港打拚了幾十年，香港繁榮我有份，卻臨老醫食有憂。今天，全港近 100 萬的長者，每三個人就有一個退休後生活艱難，原因是我們退休前工資微薄、餐搵餐食，沒有完善的退休保障，退休後拍手無塵。正是「人又老、錢又無、身體又唔好、子女幫唔到」，依靠生果金不夠養老，綜援制度僵化刻薄，數以萬計長者寧願街頭拾荒，都不願又查又審，令致家嘈屋閉。隨著人口老化和貧富兩極化，「越老越窮」成為社會的「計時炸彈」，梁振英話要「穩中求變」，如果任內唔落實推行全民退休保障，就算搞個「唔湯唔水」的特惠生果金，都係將「爛攤子」留給下一代（痢屎落褲襠等身鬆）！

全民退保變扶貧 特首縮骨要被轟轟

梁振英選舉時指：「搞全民退休保障唔駛轟轟烈烈，認認真真就得啦」，我們今天終於明白了！因為他「偷天換日」，將「全民退休保障」變成「退休保障」，再將「退休保障」變成「扶貧問題」，交由林鄭月娥的「扶貧委員會」跟進。我真想問問：林鄭月娥和很多高官一樣，家人都在外國生活，他/她們根本「不稀罕」香港的全民退休保障。我只是一個普通長者，亦是一班「貧賤不能移」的基層市民，我們關心的是香港的未來！我們從不眼紅政府預留 5000 多億給公務員作長俸，因為我們知道一個好的退休保障制度，令公務員盡忠職守為市民服務；同樣，要社會和諧穩定、長治久安，香港就需要一個「全民退休保障制度」。梁振英、林鄭月娥，你們是高官，但作為長輩，請你學習謙卑，聽清楚市民的聲音：我們「不要施捨」，我們要的是有利社會長治久安的「制度保障」！

全民性的退休保障 行公義 分風險 利全民

社會現時對如何落實全民退休保障有不同方案，我們支持「全民養老金」方案，第一、這個方案最穩陣，由政府、老闆和打工仔共同供款，唔怕綜援爆煲，唔怕經濟上落，制度穩陣，可持續推行；第二、這個方案最實際，將現有社會資源「炒埋一碟」，由政府成立啟動基金，經立法可即時推行；第三、金額水平合理，社會普遍接受金額水平足夠長者解決現時基本生活所需，日後可按通脹改善；第四、唔搞審查，像生果金一樣，長者攞得安心又開心，無須「退不能休」，也不會成為子女的負累，有利一家共融，社會和諧。一句話、搞全民退休保障計劃，可達致「行公義、分風險、利全民」。

本中心重申以下立場：

- 1) 反對政府的「縮骨」做法，將「全民退休保障」變成「貧窮問題」處理，立法會必須要求政府另行成立跨部門的獨立委員會，專責落實推行全民退休保障計劃；
- 2) 立法會須督促政府在五年任期內，就設立「全民退休保障」提出方案，進行公眾諮詢及落實推行。

老人權益中心主席 盧少蘭

2012 年 12 月 11 日